



(Dari kiri), Hafi Hadif Helmi, Hayqal Hakimi, dan Adam Norhakim mengelilingi kampung menaiki basikal sambil mengibarkan Jalur Gemilang untuk menzahirkan semangat patriotik bagi merayakan sambutan Hari Malaysia di Kampung Seberang Marang, Terengganu. (Foto Ghazali Kori/BH)



Sebahagian penduduk Bandar Warisan Puteri, Seremban menghiasi kawasan perumahan mereka dengan Jalur Gemilang sempena Program Ceria Merdeka 2020 dan Sambutan Hari Malaysia. (Foto Azrul Edham Mohd Aminuddin /BH)



Anggota Bomba dan Penyelamat Putrajaya mengibarkan Jalur Gemilang sempena Sambutan Hari Malaysia.



(Dari kiri) Kumari S Anandnan, Lisa Mat Saleh dan Koo Geok Suet berpakaian tradisional sambil mengibarkan Jalur Gemilang bagi menyambut Hari Malaysia di Kuala Terengganu, semalam.



Sebahagian peserta berbilang kaum memakai busana tradisional dan pencak silat sempena sambutan Hari Malaysia di Dataran Sultan Ismail Petra, Kota Bharu, semalam. (Foto Nik Abdullah Nik Omar /BH)

Perkukuh perpaduan, pupuk kerjasama lebih erat: Muhyiddin

Kuala Lumpur: Sambutan Hari Malaysia tahun ini perlu dijadikan peluang membugar semangat perpaduan seluruh rakyat dari Semenanjung, Sabah dan Sarawak yang bersatu hati sebagai bangsa berjaya dan dihormati, kata Tan Sri Muhyiddin Yassin.

Perdana Menteri berkata, tanggal 16 September perlu menjadi titik pembaharuan semangat perpaduan rakyat Malaysia bagi membentuk negara yang bersatu, makmur dan bermaruah, sejajar matlamat Wawasan Kemakmuran Bersama 2030.

Beliau berkata, perpaduan rakyat negara ini yang berbilang kaum, agama dan wilayah adalah tunjang utama kekuatan Malaysia sebagai negara bangsa berjaya.

"Sempena sambutan Hari Malaysia hari ini, saya menyeru saudara dan saudari sekalian agar menghayati dengan mendalam makna Hari Malaysia.

"Perkukuh perpaduan, pupuk kerjasama yang lebih erat dan tingkatkan integrasi. Insya-Allah, dengan semangat perpaduan kaum dan integrasi nasional yang jitu, Malaysia yang kita cintai dan tumpahkan sepenuh taat setia akan terus berada di landasan kukuh untuk menempa lebih banyak kejayaan pada masa akan datang.

"Saya mengambil kesempatan ini untuk mengucapkan Selamat Hari Malaysia

kepada seluruh rakyat Malaysia walau di mana jua anda berada.

"Sama-samalah kita berdoa semoga negara kita yang bertuah ini sentiasa dilimpahi rahmat keamanan, kesejahteraan dan kemakmuran berkekalan" katanya ketika berucap pada Sambutan Hari Malaysia 2020 di Sibu, Sarawak, malam tadi.

Yang turut hadir, Yang Dipertua Negeri Sarawak, Tun Abdul Taib Mahmud; Ketua Menteri Sarawak, Datuk Patinggi Abang Johari Abang Openg; Menteri Undang-Undang dan Hal Ehwal Anak Negeri Sabah, Datuk Aidi Moktar.

Mengulas lanjut, Muhyiddin berkata, sambutan Hari Malaysia perlu menjadi peringatan kepada semua rakyat Malaysia bahawa pembentukan negara tidak datang bergolek dalam sekelip mata, sebaliknya hasil perjuangan rakyat dan pemimpin terdahulu yang mahu melahirkan Malaysia yang merdeka dan bersatu-padu.

"Adalah menjadi tanggungjawab kita sebagai rakyat Malaysia yang setia dan cintakan tanah air untuk terus mempertahankan keamanan, keharmonian dan kemajuan yang kita kecapai selama ini," katanya.

Berhubung situasi semasa ekonomi negara yang susut akibat penularan COVID-19, Muhyiddin memaklumkan, ekonomi negara dijangka pulih tahun depan dengan unjuran pertumbuhan pada kadar 5.5 hingga lapan peratus, dipacu pertumbuhan ekonomi global dan domestik secara berterusan.

"Saya yakin usaha pemulihan ekonomi akan dipertingkatkan melalui Belanjawan 2021 yang akan dibentangkan di Parlimen pada bulan November nanti," katanya.

Sempena sambutan Hari Malaysia hari ini, saya menyeru saudara dan saudari sekalian agar menghayati dengan mendalam makna Hari Malaysia.

Muhyiddin Yassin,
Perdana Menteri

